

ՀՀ ԳԱԱ ՏԱՐԵԿԱՆ ԸՆԴՀԱՆՈՒՐ ԺՈՂՈՎՐ

2009 թվականի գիտական և գիտակազմակերպական ընդհանուր արդյունքներին էր նվիրված ՀՀ ԳԱԱ տարեկան ընդհանուր ժողովը, որին ներկա էին ՀՀ վարչապետ Տիգրան Սարգսյանը, Հայ եկեղեցու Արարատյան թեմի առաջնորդ Նավասարդ արքեպիսկոպոս Կճոյանը, ՀՀ կառավարության անդամներ, Ազգային ժողովի պատգամավորներ, բարձրաստիճան հյուրեր, հանրապետության բուհերի ռեկտորներ, ՀՀ ԳԱԱ արտասահմանյան անդամներ:

Ժողովը մեկնարկեց ապրիլի 21-ին ԳԱԱ գիտական բաժանմունքների տարվա արդյունքների ամփոփումով: Շահագրգիռ քննարկումներին մասնակցեցին նաև ՀՀ ԳԱԱ արտասահմանյան անդամները:

Ապրիլի 23-ին ԳԱԱ նիստերի դահլիճում գումարվեց տարեկան ընդհանուր ժողովը: Բացելով այն՝ ՀՀ ԳԱԱ նախագահ, ակադեմիկոս Ռադիկ Մարտիրոսյանը խնդրեց մեկ րոպե լռությամբ հարգել հաշվետու տարում կյանքից հեռացած ակադեմիկոսներ Արմեն Թախտաջյանի, Ֆադեյ Սարգսյանի, Աիդա Ավետիսյանի և թղթակից անդամ Արամ Քալանթարյանի հիշատակը:

Հայ առաքելական եկեղեցու Արարատյան թեմի առաջնորդ, արքեպիսկոպոս Նավասարդ Կճոյանը ժողովի մասնակիցներին փոխանցեց Ամենայն Հայոց կաթողիկոս Գարեգին Երկրորդի հայրապետական օրհնությունը և մաղթանքները՝ ի փառս հայ գիտության զարգացման և ի հաջողություն ժողովի աշխատանքների:

ՀՀ Գիտությունների ազգային ակադեմիայի 2009 թվականի գիտական գործունեության արդյունքների մասին հաշվետու զեկուցումով հանդես եկավ ՀՀ ԳԱԱ նախագահ, ակադեմիկոս Ռադիկ Մարտիրոսյանը:

Գիտությունների ազգային ակադեմիայի գիտակազմակերպական գործունեության մասին զեկուցումով հանդես եկավ ԳԱԱ ակադեմիկոս քարտուղար Արամ Շահինյանը:

Այնուհետև ծավալվեց մտքերի աշխույժ և շահագրգիռ փոխանակություն: Ելույթ ունեցան Օրգանական և դեղագործական քիմիայի գիտատեխնոլոգիական կենտրոնի տնօրեն Վիգեն Թովուզյանը, ՀՀ ԳԱԱ արտասահմանյան անդամ Սերգեյ Ադյանը, ԳԱԱ ակադեմիկոս Ռոբերտ Աթոյանը, Մ. Քոթանյանի անվան տնտեսագիտության ինստիտուտի տնօրեն Վլադիմիր Հարությունյանը, ԳԱԱ թղթակից անդամ Գևորգ Պողոսյանը, ակադեմիկոս Կոնստանտին Ղարազյոզյանը, ԳԱԱ երիտասարդ գիտնականների խորհրդի

ներկայացուցիչ Լիլիթ Սահակյանը, ԳԱԱ արտասահմանյան անդամներ Ռուբեն Մելքոնյանը և Սամվել Գրիգորյանը:

Ժողովում ելույթ ունեցավ ՀՀ վարչապետ Տիգրան Սարգսյանը, որը շնորհակալություն հայտնեց ԳԱԱ-ի նախագահությանը՝ կառավարությանը սոցիալ-տնտեսական զարգացման ծրագրի հիմքում ընկած հիմնադրույթներն ու շաղկապներն կենտրոնում պահելու համար:

– Ցանկացած կառավարության գերնպատակն է ստեղծել մրցունակ տնտեսություն: Իսկ մրցունակ տնտեսությունն ասելով՝ ժամանակակից աշխարհում հասկանում են գիտելիքի վրա հիմնված տնտեսություն: Ավելին, գիտելիքի վրա հիմնված տնտեսություն հնարավոր չէ ստեղծել, եթե հասարակությունը հիմնված չէ գիտելիքի վրա: Սա է Հայաստանի Հանրապետության հեռանկարային և երկարաժամկետ զարգացման տեսլականը: Մենք այլընտրանք չունենք, քան զարգացնել գիտությունը և դրա վրա հիմնված տնտեսությունը, – ասաց Տիգրան Սարգսյանը:

Ընդմիջումից հետո նոր, գերծանր 117-րդ տարրի հայտնագործության մասին զեկուցումով հանդես եկավ այդ հայտնագործության հեղինակներից Ռուսաստանի Գիտությունների ակադեմիայի ակադեմիկոս, ՀՀ ԳԱԱ արտասահմանյան անդամ Յուրի Հովհաննիսյանը:

«Գիտություն», 2010, ապրիլ, № 4